

AUGLÝSING**um afgreiðslutíma Borgarness Apóteks.**

Samkvæmt heimildum í reglugerð um afgreiðslutíma lyfjabúða utan Reykjavíkur nr. 305/1972 skal afgreiðslutími Borgarness Apóteks vera sem hér segir:

Mánudaga — föstudaga kl. 9—12 og 13—18.

Að öðru leyti skal gætt ákvæðis 6. greinar fyrrnefndrar reglugerðar.

Heilbrigðis- og tryggingamálaráðuneytið, 20. júní 1975.

F. h. r.

Páll Sigurðsson.

Almar Grímsson.

Nr. 316.

24. júní 1975.

SAMÞYKKT**fyrir Sparisjóð Bolungarvíkur.****1. gr.**

Sjóðurinn heitir Sparisjóður Bolungarvíkur, og er heimili hans og varnarþing í Bolungarvík.

2. gr.

Ábyrgðarmenn sjóðsins eru 20 og skulu þeir allir búsettir í Bolungarvík og fjölga um einn við hverja 100 nýja íbúa. Ábyrgð getur eigi fallið niður nema fyrir andlát, burtflutning, missi fjárræðis eða gjaldþrots, nema fundur ábyrgðarmanna samþykki. Samþykki ábyrgðarmannafundar þarf til upptöku nýrra ábyrgðarmanna í stað þeirra, sem úr falla.

3. gr.

Ábyrgðarmenn skuldbinda sig með undirskrift sinni undir samþykktir sjóðsins til þess að ábyrgjast, að hann fullnægi skuldbindingum sínum og svarar hver um sig í því skyni, ef með þarf, allt að kr. 25 000.00.

4. gr.

Stjórn sjóðsins skipa 3 menn. Skulu tveir þeirra kjörnir á aðalfundi úr flokki ábyrgðarmanna, en einn af bæjarstjórn Bolungarvíkur og sömu aðilar kjósa jafnmarga til vara og gildir kosning þeirra til eins árs. Hlutfallskosningu skal viðhafa, ef þess er óskað. Stjórnendur má endurkjósa svo oft sem vill. Þeim ábyrgðarmanni, sem gengt hefur stjórnarstörfum samfleytt í fjögur ár, er ekki skylt að taka við kosningu, fyrr en að fjórum árum liðnum. Stjórnin kýs sér formann árlega. Ekki má stjórnin reka lánastarfsemi eða aðra atvinnu, er komið geti í bága við hagsmuni sjóðsins.

Stjórn sparisjóðsins ræður sparisjóðsstjóra og starfsmenn hans og hefur umsjón með öllum framkvæmdum sjóðsins.

5. gr.

Eigi síðar en í aprílmánuði ár hvert, skal aðalfundur haldinn, og boðar formaður hann öllum ábyrgðarmönnum með minnst tveggja daga fyrirvara. Fundarboð skal

tilkynnt í ábyrgðarbréfi eða á annan sannanlegan hátt. Skulu þar lagðir fram reikningar sjóðsins fyrir næstliðið almanaksár með athugasemdum endurskoðenda og svörum stjórnar og leggur fundurinn úrskurð á þá.

Aukafundi boðar formaður á sama hátt, þegar honum þykir þörf á eða minnst 7 ábyrgðarmenn æskja þess og geta um fundarefni. Fundur er lögmætur þegar helmingur ábyrgðarmanna mætir. Mæti eigi helmingur ábyrgðarmanna, skal boða fund að nýju á sama hátt, og er hann þá lögmætur hversu fáir sem mæta. Á fundinum ræður afl atkvæða. Þó má eigi gera breytingar á samþykktum sparisjóðsins nema $\frac{2}{3}$ hlutar fundarmanna á lögmætum fundi samþykki.

6. gr.

Til að rannsaka reikninga sparisjóðsins og bókfærslu alla skal velja 2 endurskoðendur. Skulu þeir kosnir af bæjarstjórn Bolungarvíkur og kýs hún einnig varamenn, sem ganga í stað aðalmanna í forföllum þeirra. Starfssvið endurskoðenda er samkvæmt reglugerð um sparisjóði nr. 36 15. febrúar 1942.

7. gr.

Tilkynna skal bankaeftirlitinu hverjir eru kosnir endurskoðendur sparisjóðsins.

8. gr.

Stjórn sparisjóðsins er skyld að halda þær bækur, sem kveðið er á um í lögum um bókhald nr. 51/1968 og reglugerðum settum samkvæmt þeim, sbr. einnig reglugerð um sparisjóði frá 15. febrúar 1942.

9. gr.

Sparisjóðurinn tekur á móti spariinnlánum og veltiinnlánum til ávöxtunar, þó er sparisjóðurinn eigi skyldur til að taka á móti mjög stórum fjárhæðum á innlánsreikninga, ef sparisjóðsstjórnin telur það óhagkvæmt fyrir sparisjóðinn.

10. gr.

Um vexti af innlögðu og útlánuðu fé við sparisjóðinn fer eftir þeim reglum, sem Seðlabanki Íslands setur bönkum og sparisjóðum hverju sinni.

11. gr.

Þeim sem í fyrsta skipti leggur inn fé með sparisjóðskjörum, er fengin viðskiptabók. Í hvert skipti, sem fé er lagt inn eða tekið út úr sparisjóðnum, skal það um leið ritað í viðskiptabókina. Þó má í sérstökum tilfellum taka við fé, án þess að bókin sé sýnd, gegn kvittun bókara og gjaldkera, enda fellur slík kvittun úr gildi, þegar innborgunin hefur verið færð í bókin, næst þegar bókin er sýnd í sparisjóðnum. Fyrir innlögnum og útborgunum kvittar bókarí og gjaldkeri í viðskiptabókina og er það full sönnun fyrir greiðslunni. Vexti skal innfæra í viðskiptabækurnar þegar þær í fyrsta skipti eftir að vextir hafa verið lagðir við höfuðstól, eru sýndar í sparisjóðnum. Sparisjóðsstjóri og annar starfsmaður löggilda viðskiptabækurnar með undirskrift sinni. Glatist viðskiptabók, her eiganda hennar að snúa sér til sparisjóðsins. Getur sparisjóðurinn þá, eftir ósk eiganda og á hans kostnað innkallað handhafa viðskiptabókarinnar og ógilt hana á þann hátt, sem segir í lögum um sparisjóði frá 27. júní 1941.

12. gr.

Af fé, sem sparisjóðurinn ávaxtar í venjulegri sparisjóðsbók verður greitt það, sem menn óska án uppsagnarfrests, þegar sparisjóðsstjóri telur það fært. Krefjast má, að fjárhæð kr. 100 000.00 eða þar yfir, sé sagt upp með mánaðar fyrirvara.

13. gr.

Eigi er heimilt að gefa upplýsingar um eignir annarra í sparisjóðnum, nema skylt sé að lögum.

14. gr.

Sparisjóðurinn veitir lán gegn fasteignarveði, ábyrgðum, handveði og öðrum jafntryggum ábyrgðum og veðum, útlán úr hlaupareikningi og kaupir víxla. Þarf meiri hluti sparisjóðsstjórnarinnar að vera því samþykkur og hafa ákveðið tryggingu lánsins og hámark lánsupphæðar.

15. gr.

Hver sá, sem hefja vill hlaupareikningsviðskipti við sparisjóðinn skal semja um það við sparisjóðsstjóra. Um leið og hlaupareikningsviðskipti eru stofnuð, skal viðskiptamaður afhenda sjóðnum sýnishorn af undirskrift sinni.

16. gr.

Viðskiptamaður fær lausakvittun fyrir innborgun á hlaupareikning, tvírtaða ef óskað er.

17. gr.

Viðskiptamaður, er vill taka fé út úr hlaupareikningi, skal að jafnaði skrifa úr tékkaávisun á sparisjóðinn á eyðublað, er sjóðurinn sjálfur hefur til sölu. Tékkinn skal undirritaður af viðskiptamanni sjálfum eða af öðrum, sem hann hefur gefið lögfullt umboð til að ávísa á reikninginn, enda skal þá umboðið jafnframt afhent sparisjóðnum, ef það er eigi opinberlega tilkynnt.

18. gr.

Enginn má gefa út ávisun á meira fé en hann á inni á hlaupareikningi, nema sérstaklega sé um samið við sparisjóðsstjórn, enda sé yfirdráttarlán tryggt með persónuábyrgð, verðbréfum eða fasteignaveðum.

19. gr.

Innborganir og útborganir af hlaupareikningum skulu færðar þannig, að sparisjóðurinn geti látið reikningseiganda í té afrit af reikningi hans eins oft og þurfa þykir, en þó eigi sjaldnar en einu sinni á ári.

20. gr.

Í þeim atriðum, sem ekki eru tilgreind í samþykktum þessum, skal farið eftir lögum nr. 69 27. júní 1941, um sparisjóði og reglugerð fyrir sparisjóði frá 15. febrúar 1942.

21. gr.

Til að leggja sparisjóðinn niður þurfa $\frac{2}{3}$ hlutar ábyrgðarmanna að vera samþykkir því og jafnframt ber ábyrgðarmönnum að kanna vilja viðskiptamanna sjóðsins og bæjarstjórnar áður en ákvörðun er tekin um að leggja hann niður. Leggist sparisjóðurinn niður, skal varasjóður hans og aðrar eignir verða eign Bolungarvíkurkaupstaðar, en ábyrgðarmenn, sem þá eru við sjóðinn, skulu hafa rétt til þess að ráðstafa því fé nánar með samþykki stjórnarráðsins.

Framanritaðar samþykktir staðfestast hér með. Jafnframt eru felldar úr gildi samþykktir nr. 132, 27. júlí 1945, fyrir Sparisjóð Bolungarvíkur.

Viðskiptaráðuneytið, 24. júní 1975.

Ólafur Jóhannesson.

Yngvi Ólafsson.